

**Siunnersuut uunga: Inatsisartunut immikkut ittumik qinersinissaq pillugu Inatsisartut inatsisaat nr. xx, xx. xxx 2018-imeersoq**

(Naalakkersuisut Siulittaasuut)

**Saqqummiussissut**

(Naalakkersuisut Siulittaasuut)

**Siullermeerneqarnera**

Inatsisartut Suleriaasianni § 28 naapertorlugu Inatsisartunut immikkut ittumik qinersineq ulloq 24. april 2018 ingerlanneqassasoq pillugu siunnersuut Naalakkersuisut saqqummiuppaat.

Ukioq manna Inatsisartunut qinersiviusup nalinginnaasup naasussaanera siunnersuummi aallaavigineqarpoq. Politikkikkut sulinerup ingerlaavarnissaa eqqarsaatigalugu, aasalinnginnerani Inatsisartut nutaat inissitsiternissaannut piffissaqartitsiviusumik, upernaaq manna qinersinerup ingerlanneqarnissaa naleqqunnerpaatissimavara.

Aamma Naalakkersuisut nutaat aasaru sulinngiffeqarnissaq sioqqullugu piffissaqartitsiviulluartumik toqqarneqarsinnaassapput sulilersinnaassallutillu. Tamatumani Naalakkersuisut nutaat Naalakkersuisut 2019-mut aningaasanut inatsisissatut siunnersuummik, politikimik imaqartumik, piareersaanissamut periarfissaqartinneqassapput, taamatullu ukioq manna Inatsisartut ukiaanerani ataatsimiinnerisa nalaanni siunnersuutit allat pingaaruteqartut suliarineqarnissaannut piareersalereernissamut periarfissaqassaaq.

Aammattaaq isumaqarpunga Inatsisartunut qinersineq, qanoq pisoqaraluarpalluunniit pinngitsoorani ukioq manna ingerlanneqartussaq, nalinginnaasumik upernaakkut ataatsimiinnerup aallartinnissaa sioqqullugu politikikkut sulinermut sunniutilereersimasoq. Naliliinera malillugu Inatsisartunut qinersinissaq aatsaat kingusinnerusukkut suaarutigineqaraluarpat, taava Inatsisartuni politikikkut sulinermi qineqqusaarneq ersarippallaalissasoq ilimagineqarsinnaammat, tamannalu arlaannaataluunniit iluaqutiginaviangilaa.

Sooq Inatsisartunut qinersisoqassasoq suaaruteqarlunga nalunaaruteqarninni ullut marluk taasimanerikka – tassalu ulloq 17. april imaluunniit ulloq 24. april – oqallittoqangaatsiarpoq eqqoriartaarisooqarlunilu. Inatsisartunut oqaatigisinnaavara tamanna inatsisissatut siunnersuutip maannakkut saqqummiussama suliarineqarnissaanut Inatsisartut qaqugukkut aggersarneqarsinnaassanersut nalornissuteqarnermik taamaallaat tunngaveqarmat.

Nunarujussuarmi avinngarusimasumi najugaqartiterpugut, aammalu ilaasortarpassuit Inatsisartuni ataatsimiinnissamut Nuummiissinnaanissaminnut ungasissumut

angalasariaqartarput. Taamaattumik qaqugu suliassaq Inatsisartuni suliarineqarsinnaanersoq qularnaarneqareerpat aatsaat qinersinerup ullussaata aalajangerneqarnissaa kissaatigisimavara.

Tamanna tunngavigalugu neriutigaara Inatsisartut inatsisissatut siunnersuut saqqummiunneqartoq tapersissagaat aammalu matumuuna inatsisissatut siunnersuut Inatsisartuni kajumittumik suliassanngortippara.